



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3 Yangia anidakangma : Tir Yimyim tir_yimyim

tir yimyim **TAPAK 8**

Health Minister JP Nadda-i AMRIT pharmacy 10 amenoktsü

Japan Masters: Lakshya Sen semifinal nung tsükogo



VOL. XXIII ISSUE NO. 40 (ADOK 40) DIMAPUR AMUNGNÜ (SUNDAY) YIMPOKSÜI (NOVEMBER) 16, 2025 ₹ 5.00

ANCSU-i state sorkar dangi tebilemba aika abener

Kohima, November 15, 2025 (TYO): All Nagaland College Students' Union (ANCSU)-i sorkar dang Nagaland nung private coaching institutes ketdangsüa reprangtsü ayongzüko.

Honibarnü President Tenyesinlo Bukh-i anir ANCSU tanishirtemi osangbener den senden ka amendang iba tayongzüka agütsü.

"Nagaland nung private coaching institutes kanga lapoker aser item reju ajanga kaketshirtem yarir, saka state sorkari tenük yoktsüla aser agizüksüla. 2021 nungi ANCSU-i iba atema shidi aika zülüogo aser central authority ka kübok item rejutem ketdangsüa reprangtsü shiogo" ta President Bukh-i ashi.

Nagaland nung government colleges aser polytechnic institutes nung bus driver peria mali aser iba ajanga kaketshirtemi senotsü tali endoka nija transport nem taa agüja senzür. Anungji sorkari tekaratiba nung bus driver anioktsü aser transport facilities timi lemsatsü ayongzüker ta paisa ashi.

Higher Education Department

nung Director shimdang Nagaland Higher Education Service Rule, 2015 sülen anidaksüla. Ketdangsürtem merit aser seniority nung ajemdaker shimtsüla aser tang benshiba inyakyim ajanga tesayurtem tezütangdaksür aser kaketshirtem dak kongsghir ta ANCSU-i metetdaksü.

ANCSU-isa technical education indang olen ka ashidang engineering nung degree aser diploma holders 60:40 ratio asütsüla aser diploma students nem kasa maongka agütsütsüla ta shiogo.

Sorkarisa Nagaland Public Service Commission tatidang atema arishi küm telatet meyipa reprangshitsü mepishir kechiyong tang lateta aliba ajanga diploma graduates-i shilem magiteter ta ANCSU-isa metetdaksü.

Nagaland nung scholarship agütsübaren nung tebilemtsütem lir aser reju aika nung scholarship nodal cells shitak meinyaker. Anungji iba atema ketdangsürtem shimoktsüla aser lateta aliba inyakyim shitak benshitsüla ta ANCSU-isa metetdaksüogo.

NTHCC-i Ungma Statement aser Zunheboto Resolution nungi masetshir

Dimapur, November 15, 2025 (TYO): Nagaland Tribal Hohos Coordination Committee (NTHCC)-i Naga nunger longjemtsü, putepshitsü aser külemi yimtenren tarutsü yangertsü nangzüksühiogo.

NTHCC nung Angami Public Organisation, Ao Senden, Chakhesang Public Organisation, Lotha Hoho, Pochury Hoho, Rengma Hoho, Sümi Hoho, aser Nagaland Zeliang People's Organisation dena lir.

August 23, 2025 nü Ungma Village nung Naga Political Groups (NPGs) 16, Tribal Hohos 34 aser Forum for Naga Reconciliation (FNR) ajanga otsüsütsü aketba Ungma Statement yanglua agizük ta NTHCC-i sangdong ka nung ashi.

Iba sülen September 27, 2025 nü Zunheboto nung 15 NPGs, 33 Tribal Hohos, aser FNR ajanga Zunheboto Resolution yanglua agizüka liasü.

Ungma aser Zunheboto bangzüngtem den putepa NTHCC-i September 20, 2025 nü senden ka amendang Forum for Naga Reconciliation (FNR) ajanga Naga political groups ajak sabang ka nung anidentsü inyakba pusama nungittsü telemtetba agiogo.

All Nagaland GBs Association aser tanga sendaktepa alirtemi Naga political olatem ka akümtsü atema inyakba tenüngsang

agütsür. Ajisüaka Ungma aser Zunheboto nung bangzüngtem renemba anema tanga sabangtem tenteta aoba asoshi sasaa bilemer ta NTHCC-i ashi.

NTHCC nung kin hohotem dena lir aser parnoki Gaon Buras (GBs) aser tanga tribal civil society organisations (CSOs) ajak tenüng nung adener. Anungji lisopur teloktem, GBs aser CSOs-i pei pei kin hohotem dak temulung alemtsü aser tamang akatsü mepishir. Onoki kin ajunga aser Naga nunger ajak taginüba nung ajemdaker putepshiba mapa inyaker ta NTHCC sangdong nung shia lir.

Nagaland sorkari Political Affairs Committee (PAC) ajanga Ungma Statement pusama nungitba atema tenüngsang agütsür. Sorkari onok noktakba nung adenba pelashishia agizüker aser Nagaland sorkar dang maneni pusama nungittsü ayongzüker ta parnokisa ashi.

Item tangatetba nung ajemdaker NTHCC-i November 18, 2025 nü "Common Platform" nung shilem magitsü lemtetogo. Onoki Central Nagaland Tribal Council, Tenyimia Union Nagaland, aser NTHCC kintem nungi GBs iba senden nung madentsü ayongzüker. FNR lenisüba ajanga putepshitsü atema mapa inyaka aruba nung tetsükdaksü majurudaksütsü atema iba temepishiba agütsür ta ta NTHCC-isa metetdaksüogo.

Nirmala Sitharaman-i Nagaland nung lanurtem arangshinür



Honibarnü Sitharaman-i Nagaland Tool-Room & Training Centre, Dimapur nung AI & Future Skills Centre of Excellence lapoktsüba mapang tangokba noksa angur.

Dimapur, November 15, 2025 (TYO): Union Minister of Finance & Corporate Affairs, Nirmala Sitharaman-i Nagaland nung senotsüren tsütsü temelenshi aika bentsür aruogo aser tang lai lanurtem asoshi advanced skill nung temulung agütsür.

Honibarnü Sitharaman-i Nagaland Tool-Room & Training Centre, Dimapur nung AI & Future Skills Centre of Excellence lapoktsü.

Kohima nung Tata group den yaritepa semiconductor technology training agütsütsü aser Dimapur nung CYIENT Foundation den yaritepa advanced AI-driven manufacturing aser 3D printing training agütsütsü.

Item maparen ajanga Nagaland nung lanurtem nem mapa agütsütsü aser parnoki takok ngua linük nung technology nung shilem agütsü ta Sitharaman-i ashi.

Nagaland semdangba ya linük nung aspirational districts 112 nung mapa inyakba reprangdangtsü aser sorkar mapa

tongtitem takok ngua inyakdaksütsü atema lir ta lai ashi.

"Tang ni semdangba ya credit outreach programme ka lir aser iba ya bank tongtitem den yaritepa accessible loans agütsütsü atema lir" ta laisa shisem.

"2019 mesüra 2020 nung lai semdangdang CSR support ajanga Nagaland matongba ajiteta tebilemtsü aben. Iba onük ya Chief Minister-ia akangkanga jembi aser iba asoshi Centre-i Nagaland nung 2022 CSR Conclave ayongzüka amung aser iba ajanga lenmang lapoktsüogo. Nagaland nung manufacturing units mesüra service centres maliba company aika dang Nagaland nung CSR initiatives inyaksü mesüzükogo" ta Union Minister-i ashi.

"Iba conclave amungba sülen Nagaland-i CSR maparen teimba akümba dang masü saka nükjiding yur aser nübortem nüngdakba mapatem inyaksür" ta laisa ashi.

"Nagaland nung training centres aikati AI-linked production methods, 3D printing, advanced

coding, modernised handloom adaptation aser tanga new-age technologies indang course tem agir. Item wadang ajanga global manufacturing tajungba yanglushir aser industry tem lapoka aoba nung lanurtem mezügdoker. Mon ama meta talangka pilar aliba district tem nungia trainees aruba atema tenüngsang agütsür" ta Sitharaman-i ashi.

"State sorkari item maparen nung yaritepba aser CSR partners-i long-term programmes tenzükdaksüba atema tenüngsang agütsür. Naga lanurtem dak purapitettsü sempetji textiles, woodwork, aser craftsmanship ajanga sayur aser iba nung modern tools aser technologies amshia tajungba akümtsü" ta laisa ashi.

Union Minister Sitharaman-i Chief Minister Dr. Neiphiu Rio aser par cabinet den Niathu Resort nung senden ka amen aser idangji Special Assistance to States for Capital Investment scheme meyipa reprangshi.

(Maneni tapak 2 nung...)

NDA-i maneni Bihar madak yimsü asütsü

New Delhi, November 15, 2025 (Agencies): Bihar Assembly elections nung National Democratic Alliance (NDA) ajanga takok tulu ngutetogo aser menden 243 agi akümba House nung NDA-i menden 202 nung takok nguogo.

Iba ajanga Bihar nung taruba NDA sorkar akümtsü atema olemtep tenzüko aser Patna nung party balala sasep sendentem ayonga amentsü tenzüko.

MLA ajak Patna atongba sülen anogo ana-aseмка tsüngda sorkar akümtsü maparen tenzüksü ta NDA lennir kari osangbener dang shiogo.

Bihar nung tang sorkar kümsük ya November 22, 2025 nü tembangtsü. Iba anogo matongdang 18 buba assembly tentettsü.

Election Commission-i yasüng constituency ajak indang results metetdakja liasü. Bihar nung sorkar akümtsü atema party mesüra teloktep kati menden 122 nüngdaker.

Bihar Assembly elections 2025 nung BJP-i constituency 89 nung

takok ngua menden teimtiba ngutetogo. Parnok den yariteper Chief Minister Nitish Kumar-i aniba Janata Dal (United) ajanga menden 85 nung takok angu.

Maneni, NDA teloktep nung adener Union Minister Chirag Paswan-i aniba Lok Janshakti Party (Ram Vilas) ajanga menden 19, taoba Chief Minister Jitan Ram Manjhi-i aniba Hindustani Awam Morcha (Secular) ajanga menden 5 aser Upendra Kushwaha-i aniba Rashtriya Lok Morcha ajanga menden 4 nung takok angu.

NDA teloktep nungi takok tulu angurtemji Deputy Chief Minister Samrat Choudhary, Deputy Chief Minister Vijay Kumar Sinha, minister Prem Kumar, minister Maheshwar Hazari, minister Sanjay Saraogi aser BJP candidate Maithili Thakur nunger lir.

RJD-i aniba Mahagathbandhan ajanga menden 35 nung dang takok nguteta liasü. Rashtriya Janata Dal (RJD)-i menden 25, Congress-i menden 6, Communist Party of India (Marxist-Leninist) Liberation-i menden 2 aser CPI(M) o Indian Inclusive Party nati

menden kaka nung takok angu.

Külen, Hyderabad MP Asaduddin Owaisi-i aniba AIMIM-i menden 5 aser Bahujan Samaj Party (BSP)-i menden ka nung takok angu.

Opposition telok nungi takok tulu angurtemji RJD leader & Mahagathbandhan Chief Ministerial candidate Tejashwi Yadav aser CPI(ML) Liberation candidate Sandeep Saurav na lir.

Taküm Bihar assembly election nung Prashant Kishor'er Jan Suraj party ajanga menden ka danga mengutet.

Honibarnü Congress lennir Rahul Gandhi-i party president Mallikarjun Kharge den ajurutepe Bihar Assembly election result olemtepogo.

"Election results ya tesüngmangtsüka. Mezüng nungi tim mesüi inyakba election ka nung onoki takok mengutet" ta Rahul Gandhi-i ashi.

INDIA bloc-i election results jungjunga meyipa reprangshitsü aser democracy künzüka ayutsü atema mapa tuluba inyaksü ta paisa ashi.

Janjatiya Gaurav Varsh Pakhwada sentong tembangogo



Kohima, Yimpoksüi/Nov. 15 (TYO): Tanü Janjatiya Gaurav Varsh Pakhwada 2025 tembanga Nagaland Civil Secretariat nungi Nagaland Legislative Assembly (NLA) Gate, Kohima tashi Tribal Walkathon ayongzüka liasü.

Iba sentong tenzüksüsang, Advisor, Tribal Affairs & Election, H. Tovihoto Ayemi-i India nung tribal nisungtem nüchiso asoshi rarar Bhagwan Birsa Munda sor küm 150 ajungba nüngtem nung iba walkathon ya ayongzüker, ta ashi.

Iba sentong ya linük tesem ajunga nung ayongzüker, ta pai

metetdaksü.

Iba sentong nung nisung aikati shilem agiba asoshi pelaba lemsatepdang, Nagaland nung tribal nisung shilem 100 jungnüa aliba sayur, ta ashi.

Tribal nisungtemi sobaliba, arts, craftsmanship aser linük yangerba nung shilem agiba indang pai lemsatep aser linüki maneni item shilem tajung tushir ta ashi.

Secretary, Tribal Affairs Department, Angelina Tajen-i iba sentong ayongzükerba nükjidong rateta jembidang, iba Pakhwada yagi Birsa Munda dak tasü tait mulungsentsü aliba

aser pai mapa tajung inyakba asoshi akum agütsürm koba ajanga putu balala tanen makai ajungmesor, ta ashi.

Iba walkathon ya telungjem, tejak tentetba aser tashi itshia nokdakba temaitsü aser tribal nisungtem sobaliba tajung benjongba lir, ta lai ashi.

Kasa mapang DUDA Conference Hall nung Tribal Paintings aser Tribal Cuisines Competition ayongzüka liasü.

Tribal Cuisine Competition nung Khamniungan kin-i mezung jenjang ngutet, Phom aser Konyak kin-i tanabuba aser tasembuba jenjang nguteta liasü.

Nirmala Sitharaman-i Nagaland nung lanurtem ... (TAPAK 1 NUNGI...)

"Iba centre ajanga Nagaland lanurtem tashi itdaksütsü. Iba centre ya SCINT nungi teyari agia amenok aser specialised trades ana-Handloom & Handicraft aser Software Coding & Robotics sayutsü. Iba centre ajanga kümshia trades ana shia nung lanur 100 nungi 150 nem training agütsütetstü" ta SIDBI Deputy Managing Director Sudatta Mandal-i ashi.

Nagalandrongsenketzüng nung handloom and handicrafts ya kanga tongtipang lir. Iba training centre nung classrooms ana lir aser iba nung AI-supported software skills, technical & design knowledge, aser fabric innovation indang tesayubatem agütsütsü ta lai ashi.

SIDBI-i Development of Industry Associations (DIA) programme ajanga Nagaland nung local industry associations yaria arur. DIA kübok industry associations 105 tema aser MSMEs 27,000 ajangzüko go ta Sudatta Mandal-isa metetdaksü.

"Cyient Foundation nung CSR ajanga India aser bendanglen school 38 nung digital aser AI programmes agir. Kaketshirtemi technology melenshiba sülen anidaksüla aser maneni angazükba ajanga Viksit Bharat aser Atmanirbhar alizüngtem atongtsü" ta Founder Chairman, CYIENT, Chairman board of Governors, IIT Hyderabad, IIT Roorkee, NIT Warangal aser NIT Surathkal, B.V.R. Mohan Reddy-i ashi.

Iba sentong nung Industries & Commerce Director aser CEO, NTTC nem sanction letter agütsü. Maneni SIDBI aser Nagaland nung major industries bodies-Business Association of Nagas, Women Entrepreneurs Network Nagaland aser Nagaland Hotels & Restaurant Association tsüngda MoU nung sign sütep.

Union Minister-isa Phek nung Pre Fab Multi-purpose Hall aser Zunheboto nung administrative officers atema Guest House for Administrative Officers ka lapoktsü.

Item mapatong ana ya SASCI-funded projects lir aser November 15, 2025 nü Niathu Resort, Chümoukedima nungi lapoktsüko go.

Dimapur nung Territorial Army rally tenzüko go

Dimapur, Yimpoksüi/Nov. 15 (TYO): Northeast ajunga nungi lanurtem nem maongka tajung agüja anogo 15 recruitment rally Northeastern states ter ayimjema agitsü aliba November 15, 2025 nü Bhagat Stadium, Rangapahar, Dimapur nung SDO (C), Dimapur, Wiridin-i tenzüksü.

Iba rally atema reporting ya anepdang 4:30 ako nung tenzüker

aser Nagaland indang district 17, Andaman & Nicobar Islands nungi candidate 344 shilem agia liasü.

Candidates tem metre 1600 asema, Physical Fitness Test (PFT), Physical Measurement Test (PMT) aser medical screening tem yimya shidak amshia agia liasü.

Meta talang nungi aruba candidates yaritsü atema 113 TA

ajanga PFT ajangteter nem chiyongtsü aser tajemtsü tzü angati agüja liasü.

Iba den anisüngzüker aser mürekmeju alitsü mechi tesem ajunga nung metzü meshiba tesem, tajemtsü tzü agütsüba aser sanitation teyari agüja liasü.

113 TA, Dimapur District Administration aser State Police lungjemer mezung anogo tiptema agiteta liasü.



MLA & Chairman, Mokokchung District Planning and Development Board (DPDB) Noklutoshi Longkumer-i November 15, 2025 nü Mokokchung DPDB senden nung adenba sülen Dr Imkongliba Memorial District Hospital, Mokokchung nung kisü-jensüba tesem semdangba mapang tangokba noksa nung angur.

Dimapur nung mejangjaba nisung tasü mang ka nguteta lir

Dimapur, Yimpoksüi/Nov. 15 (TYO): Mejangjaba nisung (tebur, tereprangtsü nung tribal nisung mesük) arishi küm 35-40 tsüngta ka RxR Rangapahar crossing tsütsü KM 256/22-23 nung train lenmang tezülen süa aliba nguteta lir, ta November 15, 2025 anüngdang 12:25 ako meta tepang o agi osang ka Sub Urban Police Station Dimapur nungi aru.

Osang angazüker duty nung alirtem iba tesemi jangjatsü atema ao, aser tenük kuli lia tasü mang repranga liasü aser iba nisungba ya train agi tsükset südi ta temulung melemteni lir, ta Dimapur Police sangdong ka

ajanga ashi.

Ozüng agi melaba maparen ajak tembangba sülen tasü mang ya PM examination aser jangjatsü atema District Hospital Morgue nung bener oa lir.

Iba nisungba sentsü tajung, sentsü tanak aser temesüng meyoktepa aliba tula, long pant sentsü tanak aser sneaker sentsü tamak sema liasü.

Kibur/kinunger/tembar temi Officer-in-charge. Govt. Railway Police Station (GRPS), Dimapur den Mobile No. 7085055021 ajanga tongteprateptsü ayongzüker, ta Dimapur Police sangdong ajangasa ashi.

Kohima nung mejangjaba nisung kanguteta lir

Dimapur, Yimpoksüi/Nov. 15 (TYO): Dzürüzou (T-Khel) aser Meriema Village tsüngta KMC dumping site tsünglanglen mejangjaba tebur tasü mang ka November 15, 2025 anepdang 10:10 ako meta nguteta lir, ta Kohima Police sangdong ka ajanga ashi.

Tasü mang ya aben-süoshi magi aser tashi kumer liasü, anungji tenük agi junga majiteter.

Nisungba tepok nung surgery agiba tarak ka tepela nungi teko leni tua lir. Teka achichilen angüsü temerem (Kalava) sendaka liasü, anungji nisungba ya Hindu nunger südi

ta sayur.

Nisungba ya tar süklen pongu aser inches trok shi lir.

Ozüng agi melaba ajak inyaker tasü mang ya North Police Station Morgue nung yua lir, ta sangdong ajanga ashi.

Nüburtem, talisa samar aliba kinunger mesüra tembar temi, non-local lokti tentet mesüra lenirtem shirnok ket nung samar aliba indang osang ali, parnoki Officer-in-Charge, North Police Station den mobile number 7005986018 ajanga tongteprateptsü mepishir, ta Kohima Police sangdong ajangasa metetdaksü.

Mokokchung District Planning & Development Board senden menogo

Dimapur, Yimpoksüi/Nov. 15 (TYO): Ita shia amenba District Planning & Development Board (DPDB) senden Mokokchung District atema November 15, 2025 nü Deputy Commissioner, Mokokchung indang Conference Hall nung MLA & Chairman, DPDB Mokokchung, Noklutoshi Longkumer lenisüba nung mena liasü.

Asür Advisor Imkong L. Imchen nem akhum agüja minute ka ola madoki sarasadema senden tenzüker aser Deputy Commissioner & Vice Chairman DPDB Mokokchung, Ajit Kumar Verma, IAS-i züngsem tasentem pelashishia agizüka liasü.

District aser state asoshi Asür advisor, Imkong L. Imchen-i shilem tajung agiba atema Deputy Commissioner-i pelaba lemsatepa liasü.

Taoba senden nung lemteta alibatem lepa repranga iba senden tenzüker, kong Mokokchung District-i taruba küm 25 buba Dr. T. Ao Trophy ayongzüksü atema terenemshiba indang dena liasü.

Nikshay Mitra asoshi DC-i züngsemtem dang pei mulungba yimya nung ita trok asoshi TB agi shiranger adopt süa anepalutsü ajungmesoa liasü.

Paisa alu ayimba tesemtem, tzü wakzüka ayuba aser tzülu ayimba tesemtem jangjateta record süa ayutsü nüngdak ta ashi.

Senden nung Riongsanger Cultural Society Mokokchung, Agriculture Department kübok Chuchuyimlang Block ya Sub-Division jenjangi upgrade asütsü aser jang-o-tzü rizünga yua aser alemtsü atema Chuchuyimpang

Town nung godown ka yanglutsü proposal tem agizüka nüngdakba mera agitsü asoshi tim department dangi yoktsü lemtet.

Amalitep akatsü ajungmesoa aser department balala tsüngta tokteptsü asoshi best performing/innovative officials nem tenüngsang aser sempet agütsütsü board-i telemtetba agi.

Iba DPDB senden ya Bhagwan Birsa Munda sor küm 150 ajungba Janjatiya Gaurav Diwas benjongmung den külemi amen. Iba dak sendakba nung Ajay Moktan, IAS, Assistant Commissioner Mokokchung ajanga Janjatiya Gaurav Diwas benjongmung indang PowerPoint presentation ka agüja liasü.

Linük puti otsü aser nüchiso meshiba nung tribal (Janjatiya) nisungtemi tasü ita shilem agiba aser bendanga agütsüba indang Assistang Commissioner Ajay-i tejangja lemsatepa liasü.

District Planning Officer Mokokchung, N. Chuba Phom-i Board dang Advent Christmas 2025 atema sentong lemsatep, koba Metsuben Resort, Chuchuyimpang, Mokokchung nung December 5, 2025 nung ayongzüksü lir.

District Agriculture Mokokchung ajanga par department inyakyim indang PowerPoint presentation agütsü aser Deputy Commissioner-i melepzüng o jembia senden tembanga liasü.

Iba sülen MLA & Chairman DPDB Mokokchung den DC, Sr SP, ADC aser ketdangsür temi tang teyangludak Dr Imkongliba Memorial Hospital semdanga liasü.

Nowgam PS nung lendong atalokba ya asa masü: Union home ministry



Nov. 15, 2025 : Srinagar kübok Nowgam Police Station nung explosives sample apokba lendong nung asür Mohammed Shadi'er kinungertemi pa mang ayimba noksa nung angur.

New Delhi, Yimpoksüi/ November 15 (Agencies): Union home ministry-i Honibarnü sangdong ka ajanga, Jammu and Kashmir (J&K) kübok police station ka nung explosives sample apokba ya aibelenba ajanga atalokba lir, ta shiogo. Forensic examination atema sample tem bendenba mapang iba lendong ya ataloka liasü.

Nowgam police station nung yua aliba explosives sample tem ya Red Fort lendong dak sendaka aliba doctor tem idang Faridabad module nungi ngutetba liasü. Iba police station nung taoba anogo ana tashi sampling inyakyim benoka inyaka arua liasü. Explosive tem ya Faridabad nungi bener aruba liasü. Chemical aser explosive tem ya police station telung nung moapu ka nung yua liasü.

Hokolbar aonung explosives sample apokba sülen nisung 9 asü aser 27 yirua liasü aser police station kanga mejungi raksatsü.

Honibarnü osangbenertem den sensaksemba mapang MHA joint secretary Prashant Lokhande-i ashiba agi, "Nowgam Police-i tawa poster ka ajanga terror module ka puteta liasü. Bushisüngdangba mapang tapoktsü oset aser chemical aika nguteta liasü. Item osettem ya police station kima moapu ka nung kanga junga yur liasü. Ken o dak sendaka aliba agency ajak kanga junga sendaktepa inyakdar."

Ketdangsür yagi ashiba agi, Hokolbar aonung 11:30 ako nung Jammu and Kashmir kübok Nowgam police station nung explosives sample kanga sashia apok, koba asa masü

saka aibelen ka liasü.

"Inyakyim dak ajemdaker chemical aser explosives sample tem forensic aser chemical examination atema bener ao. Item osettem dak lendong keta lia asünung mongintemi kanga kümdanga amshia liasü, ajisüaka inyaksangshiba mapang Hokolbar aonung 11:20 ako meta iba sample ya aibelen poka liasü," ta pai ashi.

Iba lendong nung nisung 9 asü aser police personnel 27, revenue ketdangsür ana aser civilian asem yirua liasü.

"Police station ki kanga mejungi raksaogo aser iba temeket nung aliba kitema raksaogo. Iba lendong atalokba ya bushisüngdang südar. Ajisüaka ken o dak sendakba nung talila bilemloka aotsü madoker," ta pai ashi.

Health Minister JP Nadda-i AMRIT pharmacy 10 amenoktsü



Union Health Minister JP Nadda

New Delhi, Yimpoksüi/ November 15 (Agencies): Union sorkari Honibarnü AMRIT (Affordable Medicines and Reliable Implants for Treatment) pharmacy tasen 10 amenoktsüogo. Linük nung healthcare tashi itshidaktsütsü aser jenjang dalang agi mozü agütsütsü atema iba jenjang agiogo.

Union Health Minister JP Nadda-i, linük yimtiba nung iba sentong tenzüker küm 10 ajungba anogo sentong ka agiba mapang pharmacy tasentem ya amenokja liasü.

"AMRIT network ya 2015 küm amenok aser state aser Union Territories 24 nung outlet

255 dak tema jungogo," ta Nadda-i ashiba den, AMRIT tenzüker küm ter temelenshi balala adoka inyaksangshiyonga aruba atema pelaba lemsatapa liasü.

Centre tasentem ya PGI Neuroscience Centre, Chandigarh, GMCH Unit-II, Jammu, State Cancer Institute, Jammu, AIIMS Deogarh, Dental Hospital Srinagar, SCTIMST, Trivandrum, Mumbai Port Trust, IIT Jodhpur, AIIMS Gorakhpur, aser AIIMS Kalyani Unit 3 nunger nung inyaksangshi tenzüksü.

"Linük nung nüburtem ajak nem jenjang dalang agi healthcare facility tajung

agütsütsü atema 2014 küm sorkari AMRIT aser Jan Aushadi Centres amenok," ta Nadda-i ashi.

"Item centre tem yagi tenüngdakba mozütem anepalutsüba den oncology nungi tenzüker cardiac car, orthopaedic care aser specialised interventions atema mozü aser medical device tem atema teyari agütsür," ta pai shisem.

Item outlet tem yagi tenüngdakba mozü, taküm kümzüksü asoshi mozütem aser medical device tem jenjang kanga ajemer agütsür, koba yimya agi maximum retail price (MRP) dang nungi shilem 50 agi tajembasa asür.

Item pharmacy tem nung mozü aser medical products 6,500 dak tema angutsü aser iba ajanga linük ajunga nung shiranger crore 6.85 dak tema ajangzüker.

AMRIT pharmacy tem ya AIIMS campus ajak aser tanga tongtibang institute tem nung amenoka lir.

Nadda-isa, HLL Lifecare Limited (HLL) dang AMRIT outlet ya 500 tashibo amenoktsütsü mepeshia liasü.

BJP Bihar unit-i taoba union minister RK Singh suspend sütsü

New Delhi, Yimpoksüi/ November 15 (Agencies): Bihar indang Bharatiya Janata Party (BJP) unit-i Honibarnü taoba mapang union minister R K Singh aser BJP MLC Ashok Agarwal na party anema inyaksangshiba atema suspend sütsüogo.

Official shiti ajanga ashiba agi, lokti tentet yongtsü nung yimyayimpong meshitak benshiba azüoktsü aser parnoki maneni party anema inyakba ajanga iba jenjang agitsüsa aküm. Lenir anaprongla dang hopta ka tsüngda parnok tamendakdak jangjashitsütsü metetdaksüogo.

National Democratic Alliance (NDA)-i Bihar election nung takok tajung anguba sülen anogo ka lir iba ya ataloka liasü.

BJP party yongtsü nung iba ken o jangja alirtemi ashiba agi, Ara nungi taoba mapang BJP MP, Singh-i election atema nüboyimba mapang party anema inyaksangshiba atema

iba jenjang ya agia liasü.

Singh-i party lenirtem aser tekolak nung alirtem anema jembia aruogo.

Kasa mapang nung Agarwal'er jabaso ya Vikassheel Insaan Party (VIP) ticket amer Katihar menden nungi toktepa liasü.

RK Singh ya taoba mapang Indian Administrative Services officer ka liasü, shiba new and renewable energy minister-a liasü. Singh ya English literature aser law nung degree bena aliba nisung ka lir.

Pa 2011 nungi 2013 tashi Union Home Secretary liasü aser pa taoba mapang Bihar kübok Arrah nungi MP liasü. 2005 küm Nitish Kumar CM akümba mapang Singh ya principal secretary kümdaktsü.

2015 küm Singh-i, Bihar assembly election atema ozüng alema inyaksangshirtem nem ticket agütsüba atema BJP aija liasü. Paisa, ticket atema sen agiba atema Bihar nung lenirtem aija liasü.

NIA-i kiralongrar den sendaka aliba MBBS kaketshir ka apu



New Delhi, Yimpoksüi/ November 15 (Agencies): National Investigation Agency (NIA)-i kiralongrar telok den sendaka aliba MBBS kaketshir ka West Bengal kübok Uttar Dinajpur district nung puogo, ta police ketdangsür kati Honibarnü metetdaksü.

Aija alisang ya Janisur Alam ta jangjaogo, shiba Al-Falah University, Haryana nung azünger aser pa ya Ludhiana nung alir. Tetsü tebou nunger yabo Uttar Dinajpur kübok Dalkhola anasa Konal yimtsüng nungi lir. Pa ya Hokolbar anepdang Surjapur Bazar nung apu, ta pai ashi.

Alam ya par yimdak kiyimba benjung ka nung dener aruba mapang apu. Pa ya kiralongrar den sendaka alitsü ta temulung melemi NIA-i puogo, ta pai ashi.

"Asanguba ya Haryana kübok Al-Falah University nung medical kaketshir ka lir. Pa tetsü aser adianu ka den kinunger ka kiyimba benjung nung adeni par yimdaki oa liasü. Mobile-tower location data ajanga pa senzäsenpongba meita aoba sülen NIA ketdangsürtemi pa

pua liasü," ta ketdangsür yagi ashi.

Pa ya tawa Delhi nung lendong atalokba dak sendaka alitsü ta temulung melemi bilemer, ta ketdangsür yagisa shisem.

Ajisüaka NIA-i, Nisar ya Delhi lendong den koda sendaktepa ali iba indang osang tejangja magütsü.

Tanga ketdangsür kati ashiba agi, Alam ya mapu tsüngda iba tesem nung station ka anasa temulung malemtsüsa senzäsenponga liasü.

"Ken o ashishiba mapang pai jena aotsü merang aser iba sülen pa sota yua liasü," ta NIA source kati ashi.

"Pa Delhi lendong den indang indanga sendaktepa aliba mali aji tang tashi mejangjai lir. Pa ket nungi Digital device aser kuli kakettem puogo," ta paisa ashi.

Aija alisang dang ken o ashishitsü aser bushisüngdangtsü atema pa Siliguri-i anirogo.

Delhi nung lendong atalokba sülen NIA-i tesem aika meita odor aser temulung melemi bilemertem sota ken o ashishidar.



TIR YIMYIM YIMOBILEM (EDITRIAL)

DIMAPUR SUNDAY, NOVEMBER (YIMPOKSÜI) 16, 2025

Tsüngremer tembartem

Asenoki aiben asenok ya Tsüngremer lar amato bilemer aser yamaji jembir. Ajisüaka, Tsüngremi ashiba angaa Pa den külemi jajartemji alar masü aser kilira masü saka Tsüngremer tembartem lir. Ibaji Yisu Khristai Yohan 15: 15 nung yamai jangjajangjaa shia lir, "joko, ni nenok dang kilirtem ta majar, kechiyong kilirtemi parnok kiburi kechi inyaker memetetter, saka ni nenok dang tembartem ta ajar, kechiyong ni kübu nungi angashiba ajak nenok nem metetdaksür." Asenok asoshi osang tajungji ibaji ka lir. Iba osang jagi tetsübu aser tarendak samadaksür. Alima nung asen tembar tajung aliba agi timtem nung teyari angur aser tejashi nung mulung süngzüker. Tsürabur maliyonga tembar tajung lira, kangabo shisamebulur kechiyong tembartem dakji asenoki temulung alemar. Ajisüaka, Tsüngrem den tembar ayimbajibo alima tembartem den atishiteptsüla masü. Atangji, asenok ya Tsüngrem tembar asütsü yangluba masü mesüra asenoki Tsüngrem den tembar kümnüba agi akümtsüba masü. Ibaibo Tsüngremi asenok dang taochi balaka sayua jatetba mapa ka lir. Akhi tejen putu nung Tsüngrem ashia angaa pa tsüngsü nung jajartem aika liaka, Tsüngrem tembarbo ana dang liasü. Kaji Abraham. Pai Tsüngrem den kanga anasa jajaba agi Tsüngremi pa dang "Kü tembar" ta aja (Isaia 41:08). Ano kaji, Mosa. Tsüngremi Mosa denbo tembar den jembir ama tejak o tejak na jitepa jembiba otsü ka asenoki Anitet 33:11 nung angutsü. Ibaji tepelatsü aser tesüngmangtsü mapa ka lir. Atangji, Tsüngremji temeim Tsüngrem, anungji Pai asenok ajak anepalur. Pa temeim agi asenok ajak kümzü, ajisüaka asenokibo Pa asoshi tajung kecha meinyaktetter. Aji oda, Tsüngremi Pa tembar asütsü shimtettsüsa taküm yimya nung litetba nisungji tesüngmangtsüka lir. Tanü asenoki Abrahami amangba ama Tsüngrem dak mamangtetter aser Mosa ama asenoki asen nübortem asoshi aria mebilemer. Ajisüaka, Tsüngremi asenoka Pa tembar asütsü shimtetba maongka aser taochiji koda tulu asütsü. Yisui Pa nütsüngtem dang Pa tembar asütsü ta ashiba kuliji ka liasü. Ibaji Tsüngrem miim o ajak Pai parnok dang ashi, kechiyong Pai parnok dak temulung lemteta liasü. Aji oda, tebu Tsüngremi Pa dang kechi ashi aser Pai Pa nungi kechi angashi, item ajakji Yisui nütsüngtem lemsatet. Iba temulung lemtetba jagi Yisui Pa nütsüngtem nem Pa dak aliba ain aser tashi ajak agütsü. Iba ain aser tashi nung Yisui alima nung inyakba sayatenya mapa ajak nütsüngtemi inyaktet. Tanüa Yisui asenok ajak ya Pa tembar sünür. Pai asenok nem Pa dak aketba ain aser tashi ajak agütsüner. Pai asenok ya Pa tembar kümer yariner. Yisu alimai aru aser asenok menen atema kangki nung timtemseta asü saka shia aru. Iba timtem aser takok ajanga joko asenok Tsüngremer lar masü aser kilir a masü saka Tsüngremer tembartem aküm. Koda tepelatsü aser jangratemtsü. Iba jagi tanüla nung kanga asüküma bilemer. Alima nung tulurtem den tembar akümtsüabajibo yutsür, nüngdak tila ashitsü atema ken ajuteptsüa tasak aser majurutepteter. Ajisüaka, Yisui, joko nenok kü tembar, anungji kodangsa nenok nüngdak adokdir kü dangi arung, kü dang shiang ta ashiba temeim o ji asenok asoshi tesüngmangtsü taochi o asütsü. Iba taochi o ji asenok rongnung kari danga mangashii lira mesüra angashiyonga iba toachiji magiteti lira, tanü Yisui asenok dang nenshia ashir, "arung, nenok tebelemer aser kureta abenertem, ni nenok nem anisüngzü agütsüdi." Asenoki tama masü Tsüngremiang tama asenok meim aser tanüa Pai asenok den tembar kümner. Tsüngrem den tembar kümer alitsüba taküm aser kibongji koda jangratemtsüka asütsü. Tsüngrem den tembar akümbajibo alima chuba aser yimsüsürtem meyerijang den tembar akümba dang nungi kanga agia taoba aser tajungba. Nai naji Tsüngrem tembar masü amato bilemra, iba yimobilem ya züngzüker, nü mulungsentsü aser tanüla ajak agi Tsüngrem bushiang aser Pai nü dena tembar ayimtsü.

OLEMSABANG

MEMENUDANG KIDANGI SHILANGANGMA

~ Wb. Imli P Lemtur, Jorhat

(Iba Yimjangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

Kikümbang nung ni bangka bangka yamaji bilema noktaka alidang, küyi Leptsüna Lemtur asema arur, kü dak azüloker, jeba ashi, "ayaa! Molungtok! (kü tenüng Molungtok Lemtur) yashi Tir Yimyim paper nung adokba osang ngur südi? Iba Sumo cari accident nungto, shinga mekümsük. La jepeta...aser Oja-o Oba-na; tenaprongla iba Sumo nungto mena liasü!"ayaa..na alisübo..." iba sülen, küyi-i kü dang o aika ashi, saka ni kecha mangashi. Kü mang nung, azü jajaba anenadok. Alima tammang kümadok...

Ni ozü tsürabur aser künu küyi nungertem nungi pilar joko küm 8 buba. 1998 küm, ni tasoba küm 21 asüdag, ozü yim doktsüba sülen, Phone nunga khen danga parnok den mejembi, kechiaser ozü yimdak landline Phoneji, kibong ishika kidang dang liasü. Ni tetsübu nung, parnok dangi shiti-a khen danga mezülü; kechiaser ni ozü tsürabur aser adianu nungertem den, pelatepa senshiba masü. Rarateper asateper kodanga kidangi meyipba marutsü ta asaloktsür ki doktsüba taküm ni liasü. Parnokibo ni bushir alitsü. Ni memetet. Ni kidang nungi ayazükdang kübo kidang maliasü. Künu aser küyi, tena ajeba ola dang tashi kü narong nung lir. Kütsübo majeb saka la temulung poksa ajeba ni la tenük nung anguba, kü nükla dangi tanüa arur. Oda kangasa ni parnok temulung shirangdaksüogo-ne!

Adianu onok asem rongnung ni san tanak liasü. Tetezü samaro. Saka Ozü tsürabur aser adianuibo kanga meim. Dokan nung anguba aser dokan nung manguba temesepba chiyungtsütem, ni mechidangba aser memenak dangba kata mali. Ajakji kübu ayangba sen nungi alia achi aser sen mangudang auyatsü. Samesa taküm. Aongnung shia, ni kidangi menür shilangdang, kütsüi ni asoshi sarasademtsüa-sa liasü. La sarasademba angashia ni kangasa ain adok. Kechiaser ni kidangi aruba meteta, kü nem angashidaksütsü aoshi, kütsüi ola atoka sarasademer ta-sa ni bilem. Tangang shisadang nung, asenok kidangi maru tashi, asen tsüraburbo amo mo-i, nüken belema, memejangi asenok aruba atar. Shibai metet, ni dang kidangi aodanga kütsübo ni asoshi sarasademtsüa alitsü.

Ozü tsürabur aser künu Sürati Lemtur aser keyi Leptsüna Lemtur, parnok den, khen danga külemi, atepzüng nung mener chi mechiyungdang. Aongnung ayatrem nungang kidangi shilangtsü aser mapabo kecha inyaker masü sürnung, anepdang menur saktsü. Azümesen tetsüti sürnung poksak. Chiyungbaji yimerpok dang nungi tuluba chiyungtsü. Anepdang pi dangar ajak mapai oer saktsü aser kidang ojalai soruchioker alibaji, ak amai chiyunger ayazükbbaji, kodang kechi tia nung, kechi ken O menasemer, kidangi shilangtsü ashitsü makokba taküm ka ni liasü.

Ni schooli mo-i jenshia senzüba ajanga, tesayurtemi küyi Leptsüna, Headmasterba office-i, mapang shia jaokba ni bilemtetter. Class VIII nung anaben tashi 'just fail' asüba agi school doktsü. 'Class VIII tashi shibai kü indang lesson züngtsü?' ta sa bilemer. Ni school doktsübbaji, kü dang nungi kü class teacher Sapreena madam aser Headmasterba dena tepelatiba liasü. Anogo shia raratepsang, aser school nungi ajensang mali. Temesepba chiyungtsü lar asü nung, ni tereprangtsübo nashi pongchi tang tasütsü shiranger amai, saka künu Sürati-i, ni keyi (tiger) amai tsübu liasü. Ni pa, khen danga mepongdangi tain kümdaktsüba, tanü kanga temulung shiranga bilemer. "Talak Sürati! Odi dang tai tokangma nuh. Odi kidangi meyipa arur. Ni ne nem süoshi aika alitsüa lir. Nai kanga aginüba Jean Shirt tua alitsüa lir."

Kiyonger indang azü (dog) aser an (hen) sama shia, kiyonger meeting nung, kübo temeimtsüka, tekolak angüma matoteti, kiyonger tajungtemi o shia liasü. Ojala, ni asoshi sarasadema shisabuluba ajanga, temulungjang tashidak agi tonger, ano jungi tantsür kümdaktsü. Yimsüsürtema ni jaokba agi lakya liasü. Kenbo Yimsüsür kati yamai ashi, "Molungtok Lemtur, den ita bo kecha sentong mali anah!?" Tesüngmangtsüka iba itaji, ken o kecha memenaba agi asüngdangberba liasü.

December ita arudang, tangar kibongtembo, pelatepa Christmas naro enoka, jangratema, Yisu asoba benjong among. Saka ozü kibongbo, ni majungba ajanga, December itaji, tetsübutiba ita-sa liasü. Kechiaser, ni asoshi December itaji, Yi ajemtsü, rarateptsü aser auyatsü mapang tajung. Christmas arudang, "taküma kechi senchi menchi bener arutsütüar?" ta, kü tsürabur kanga shisa bulua liasü. Künu aser küyi na, kü dak metsüdakba yong, CYE (Christian Youth Endeavour) sentong balala kecha nunga medentet. Auür-sang tünu! Auürisang teyi! ta sa ajaba agi, dena nema metangteti, loktiliba kecha nunga metenisa aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bangladesh nung tamangba yimsü temeden indang tebilemtsü akar

Dhaka, Yimpoksüi/Nov. 15 (Agencies): Bangladesh nung Catholic nunger tekülem ki aser school tem dak tenük yoker ita ka tsüngta crude bomb pezü pokdaktsüba ajanga Khristan lenirtem saksalemdaktsür, aser item tatalokba yagi Muslim nunger timba aliba linük nung tamangba yimsü temeden atema tebilemtsü tasen adokdaktsür ta ashir.

"Bangladesh nung kodanga matalokdangba lendong atalokba ajanga Khristanpur kanga aoksar aser saksalemer," ta Archbishop Bejoy N. D'Cruze of Dhaka ajanga November 12 sangdong ka nung ashi.

Pai Nobel sempet ngur alisang Muhammad Yunus-i aniba interim government dang Khristanpur aser danga tamangba yimsü tsütsü kin tilatem tetsübo makai pei yimsü amshitsüsa tekeraba nung jangjateta merenshitsü ajungshi.

Bangladesh nung Khristanpur 500,000 shi lir aser shisaluyim, health aser social services ajanga linük terenlok nung mapang talangka nungi shilem agia aru, ta D'Cruze-i

ashi aser iba ama lendong agütsüba ya kanga tejashitsüka lir aser linük indang secularism tendangba lir ta ashi.

2001 küm Baniarchor nung tekülem kidang bomb pokdaktsüba nung tamanger nisung 10 takum samatsüba densema tesüiba mapang Khristanpur anema azüdokshiba ken o aika mebenteti lir, ta pai ashi.

Tawa lendong atalokba shidak bushisüngdang masüba ajanga mapa tamajung inyaker temulung tali uludaktsütsü aser kin tsüngta mepetmesü adokdaktsütsü, ta pai tekumdangtsü ashi.

Linük ajunga nung Year of Jubilee benjongtsü ghonda ishika lia November 7 aonung Dhaka nung aliba St. Mary's Cathedral indang kishizüing nung crude bombs ana poklokja liasü, kong Catholic nunger 600 arua adentsü imlaa liasü.

Tasüing St. Joseph's Higher Secondary School and College telungi aidak crude bombs kar mereploktsü.

October 8 nunga Tejgaon nung aliba Holy Rosary Church nunga iba mesük tenük yoka

liasü, koba Bangladesh nung Catholic nunger tekülem ki tejentiba rongnung ka lir. Pope Francis-i 2017 küm Bangladesh semdangba mapang St. Mary's aser Holy Rosary ya semdanga liasü.

Police temi temulung melemi alirtem aser parnok nükjidong temai madoktsü, saka media osang kar nungbo taoba ato kilonser Sheik Hasina'er Awami League sorkar bhukumertem dena lir ta ashi, shiba kaketshir temi anir sorkar anema longkak aitba ajanga August 5 nü India-i jena ao.

Hasina indang sorkar laoba sülen Arogo indang reju kar nung timtem agütsü, kechiaser Hasina anemer temi tesayur kar Hasina yimli bhukumer ta züingshir.

La jena aoba sülen Catholic school aika nungi Awami League tashi angar ta kaketshir temi tai tongloktsüba tesayurtem mapa nungi anentsü.

Yunus administration-i tang tesüsa lendong atalokba ya yimtenren tsütsü nungi lir amai ajiteter ta ashi aser lendong agütsür jangjatepa aputsü nangzüka lir.

Bishops temi Tamil Nadu nung education policy melenshitsü ajungshir



Archbishop Georfe Anthonysamy

Chennai, Yimpoksüi/Nov. 15 (Agencies): India south len Tamil Nadu state nung aliba Catholic bishops temi provincial government dang Khristanpuri lapoka aliba school tem nung kanga mejungi kongshitsüsa tebensa adokdaktsüba education policy tem tembangtsü ajungshir.

Madras-Mylapore indang Archbishop Georfe Anthonysamy-i anir Tamil Nadu Bishops' Council (TNBC) indang delegation kati November 13, 2025 nü state yimtiba Chennai nung Chief Minister M. K. Stalin ajurua liasü.

TNBC tir Anthonyswamy-i chief minister nem tezüluba ka agütsüba nung Tamil Nadu Private Schools Regulation Act, 2018 indang ozüing kar salatsü ajungshia liasü.

Father Antonymsamy Solomon, secretary of the bishops' education commission ajanga ashiba agi, state nung 2018 küm education policy yanglushiba sülen ozüing tasentem ya 2023 nung yanglu.

"Ozüing tasenba yagi kin tilatemi lapoka aliba kaket rejutem nung tenokdangba balala agüja lir," ta Solomon-i November 14 nü ashi, shiba Tamil Nadu CM ajururtem rongnung dena liasü.

Tesüiba mapang ama masü, school tasen ka lapoktsü asoshi tangbo sorkar nungi jelia temelaba meshitsüla, endowment fund timba kumtsü aser staff indang itasen ita ana indang rizünga ayutsü nüngdaker, ta pai ashi.

Tesayurtem internal transfer nunga tenokdangba liasü aser 'minimum staff-to-student ratio' benoka lir, ta Solomon-i ashi.

Bishop temi Stalin dang textbooks aser laptops ama sorkari angati oset balala alemba nunga kin tilatem indang kaket reju anema bensaa amshiba anendaktsütsü ajungshia liasü.

"Sorkari lapoka aliba school tem nung kaketshir ajunga iba amala nungi teyari angur, saka kin tila temi lapoka aliba school tem nung azüngba kaketshir shilem tila kati dang item angati teyari oset ya angur," ta

Solomon-i ashi.

Sorkari item school tem nung azüngba kaketshir atema higher education nung reserved quotas agütsür, saka Arogo temi lapokba nung azünger sensaker kaketshir asoshi iba amala sentong tejangja mali.

"Onok school timba meta tezülen yimtsüngtem nung lir, kong sorkar indang school tem peria mali," ta parnoki chief minister dang ashi.

Tamil Nadu nung sorkar agütsüba teyari anguba school 8,403 nungi Khristanpuri lapokba school 6,000 shi lir. Item nungi 2,300 shi Catholic Church-i lapokba school tem lir.

Item teyari agiba school tem ya Arogo aser danga yimsü temi lapokba aser minority institutions tem lir, aser curriculum aser examination pattern nung state indang ozüing sülen anidaker.

Fee structure aser staff tem shimba ya state sorkar ozüing agi amokbanga lir.

"Sorkari item ozüing ya magienra, minority institutions tem tesüiba mapang ama inyakyim sadok-sayim mesütettsü," ta Solomon-i ashi.

Iba delegation nung adener Bishop Lourdu Anandam of Sivagangai diocese ajanga ashiba agi, "Chief minister den senden tajung menogo, shibai onok jembiba kanga junga angaa liasü aser onok dang iba tebilemtsü bentettsü ashi."

Tamil Nadu nung nisung million 76 dak tema aliba nungi Khristanpur shilem 6 shi lir aser shilem 87 dak tema Hindu nunger lir.

ANOGO ABEN TSÜNGREM DEN

TEMENEN ASOSHI MANGYIMBA

Shiri mang ayimer parnok temoatsüba: kechiaser parnok süneptsütsü. Mathi 5:4

jangratema lidaktsüner. Kü tepela nenok dak alitsi aser Tsüngremi pa chirtem ajak tepela aser temoatsü nang nenok tepela peridaktsütsü asoshi ni nenok dang itemi jembiogo. Yohan 15:11 Tsüngrem sentong aser tejangrabaj meimchir shia pa den teti sentaktepa shitakba litetba taklim südaktsüner. Ibaji alima miemchir ajak temenen nung tekümtet ngua taküm nung tepela chirtem kümdaktsürnet Yisu Khristai aginübaji Khristan shiai temenen bushitsüla aser kukua mangyimer ama jepa pei temenen nangzüksüla kechiaser temenen ajanga tejashi aser takoksa bener arutsür iba jagi tasüba lir aser iba yongji kodanga Tsüngrem sentsüwangshi metongteter. Saka Yisu Khrista ajanga temulung raksa pei temenen tatok bushirtem nem tatok aser anisüngzük bener arutsür. Tsüngrem taochi ajanga meimchir ajak nem tekümtet bener arutsü. Takar-makar, tashir-mashir aser tetsür-tebur tebendang makai kasa tekümtet agütsü. Ibai jenjang yong masü saka ajak nem angati agütsü Temulungjang telungtiba nungi pei menen asoshi jashia mang yima tatok meshitsübaji dang asen mapa.

"Oh Tsüngrem, ne temeim yimlibilem yari kü dang aochiang, kü ozüing raksaba tai endokjang, Kü tai ajak nungi meshimeshia ni shitokjang, aser kü temenen nungi ni merüktetjang." ta pei menen asoshi Dawidi T.Ken. 51 nung sarasademba ama asenoka pei temenen asoshi mang yima sarasademdi. Iba ama sarasadem Tsüngremi kodanga melangzüi malitsü.

Gari lendong nung nisung ka tsüksetba sülen putir ka bail bushir

Bhubaneswar, Yimpoksüi/Nov. 15 (Agencies): India anüdoklen Sambalpur diocese nung ketdangsür temi November 13 nü putir ka asoshi bail application agütsü, shiba hopta tetenzüklen gari lendong nung motorcyclist ka tsüksetba dak sendakba nung apu.

Odisha state nung Sambalpur district kübok Hiro yimtsüng nung arishi küm 51 tain Father Paul Adapoor indang gari agi motorcycle ka den tsüktepa motorcycle anisang tsüksetba sülen November 9 nü pa apu.

Iba lendong atalokba sülen putir ya apu.

"Pa tepuokdak nungi agizüktsü onoki tamang akar," ta Jyoti Bhavan Minor Seminary indang rector aser iba ken o anepalur putir Father Johny Anthony-i osangbener dang ashi.

Adapoor ya Sambalpur jila nungi Meghpal yimtsüng nung par arogo bushia aoba mapang gari ya tsüktepa liasü. Motorcycle anisang ta yi agi meseper kanga kera ania liasü, helmet masem aser lenmang tai nung liasü, ta Anthony-i ashi.

"Pa helmet sema ali asübo mesüla."

Lendong ataloker bushisüngdangba mapang Adapoor-i brakes ajem aser akok tashi metsükteptsü merang, ta Anthony-i ashi.

Arogo odongtar Father Anil Kumar Kujur-i ashiba agi,

Bishop Niranjan Sualsingh aser putir temi November 12 nü Sambalpur nung tepuokdak Adapoor semdanga liasü.

Iba lendong atalokba sülen nisung telok tuluka adenshi aser nisung kari putir merenshi ta ashir.

Police arua pa kumzüik aser takum kumzüiktsü atema aser ozüing agi melaba maparen inyaktsü atema police station-i pa anir ao.

Adapoor-i gari anepalu mesüi ani aser zübazüyima yutsüba yong nisung asü aser 'culpable homicide not amounting to murder' ta ken o benok.

Police temi tiazü nung homicide charge ya bendenlok, ta arogoi aitsür, koba ajanga nisung asüba ya asaa lir ta kuli bushitet nungbo takum tepiyong tepuokdak ayutsü. Nisung asüba ya asaa masü ta kuli bushitet yonga pa tepuokdak küm ter tashi ayutsü.

Bishop Sualsingh-i Catholic nunger dang Adapoor aser asüri yutsür aoba kinunger asoshi sarasademtsütsü ayongzüik.

Odisha nung Khristanpur tsütsü yimya tamajung amshiba maneni lir, kong Khristanpur anema rongrong adokba aiben ajangshia lir. Hindu bhukumba Bharatiya Janata Party yimsüsüba mendeni 2024 küm June ita aruba sülen tensa tamajungba kumogo, ta Khristan lenirtemi ashir.

AO OSHI ANGAZÜKDAK:**TANÜ ANGAZÜKTSÜBA OJANG****Tsüjenojen****(adj)** ken o tejen (old case)

* Tsüjenojen o lephiba agi meputepang adoker.

Tsük**(v)** azüklen n ungi mopong nung aluba (fall down from height)

* Ni süngdong nungi tsük.



Tir Yimym

OLONG PAITEP # 7331

1			2			3			4	
			5		6		7			
8										
			9							
	10									
15						16				

TIPIEN

1. Anenzükdak ki
3. Asür mangyimba
5. Temulung nung shisadang
8. T ___ lu
10. Takdang temalen
11. Tesa ___ a
13. Ajungbena temulungjang
- tongtonglatsü atu
15. Tejen lai nung tesayur
16. Tsünsak-mopung

- (5)

- (5)

- (5)

- (3)

- (9)

- (3)

- (5)

- (5)

- (5)

- (5)

LANGTSÜNGLEN

1. Reprangdaksü
2. ___ ur
4. Kiojen yangludak
6. ___ ait
7. Nagaland nung ayong ka
9. Küm kasa purtem
10. Tetsüng tajemtdak
12. ___ adenshi
14. Tsünüsenbongtsü adokdak

- (4)

- (3)

- (6)

- (7)

- (5)

- (5)

- (6)

- (4)

- (3)

OLONG PAITEP # 7330 TELANGZÜBA**TIPIEN :**

5. Ajak, 6. Wabong, 8. Taju,
10. Oro, 11. Talila, 13. Likok,
15. Laktet, 17. Yok, 19. Magi,
21. Teyari, 22. Aiwa.

LANGTSÜNGLEN :

1. Tamet, 2. San, 3. Maru, 4. Soro,
7. Tali, 8. Tila, 9. Jakla, 12. Akki,
14. Oagi, 16. Tapak, 18. Keyi,
19. Meru, 20. Kin.

NAI-A YA METETTER

Kentener Palak Muchhal tenüing Guinness Book of World Records nung züluokogo. Iba ya Palak Muchhal-i music atema masü saka lar Palak Palash Charitable Foundation ajanga India kübok tesem balala nung sensaker tanur 3947 dak heart surgeries agiba atema lir.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Shillong Cherry Blossom Music & Arts Festival 2025 tenzükogo

Guwahati, November 15, 2025 (Agencies): Honibar nungi Shillong Cherry Blossom Music & Arts Festival 2025 tenzükogo aser Chief Minister Conrad K Sangma-i iba benjung tematiba jenjangi atutsü ta metetdaksü.

Tanü Jawaharlal Nehru Stadium nung nisung meyrjang aika adenshia benjungtep. Chief Minister Conrad den Tourism Minister Timothy D Shira aser Commissioner & Secretary Vijay Kumar D nungeri ribbon mejebdanga benjung lapoktsü.

"Iba benjung ya linük nung tulutiba rongnung ka lir. Nenok teyari ajanga iba ya tulutiba aser tajungtiba kümdaksütsü. Onoki iba nükjidong yua lir. Iba benjung ajanga Meghalaya nung tourism economy ajungketer aser nisung o kibong meyrjang aika dak kongshir" ta Conrad-i ashi.

"Star Arena" nung Dappest & ADL ajanga kenten benjung

tenzük aser parnok sülen Walter Wahlang-i shilem agi.

Bollywood performer Nora Fatehi-ia "World of Nora" showcase saya aser tawa sayaba "What Do I Know (Just a Girl)" ken aten.

Meghalaya Chief Minister Conrad K. Sangma-i yashi Shillong Cherry Blossom Festival 2025 atema lineup metetdakja liasü.

Polo Ground nung benjung amungdang Irish rock band The Script, R&B artist Jason Derulo, DJ Diplo, pop band Aqua, aser Bollywood performer Nora Fatehi nungeri shilem agitsü.

Benjung anogo tanabuba nung Zuble, Priyanka, Prabin, aser Arupjyoti ajanga kentener Zubeen Garg nem tetushi agütsütsü.

"Cherry Blossom Festival 2025 nung music, art, aser culture sayutsü. Onoki

sensotem aser ainertem ajak iba benjung nung adentsü jaoker" ta Chief Minister Conrad-i ashi.

Iba benjungmung nung Meba Ofilia, Dappest and adL, rock band Girish and the Chronicles, aser Arius nungeria shilem agitsü.

Benjungmung nung Mr. and Ms. Cherry Blossom tetoktepba aser cosplay, aser Cherry Blossom arm wrestling alitsü.

Iba benjung atema B o o k M y S h o w , shillongcherryblossom.com, aser Shillong nung box offices nung tickets angutsü.

Cherry Blossom Festival 2025 ajanga The Week Heritage Awards 2025 nung Best Cultural Music & Dance atema Golden Banyan Award aser WOW Awards Asia 2025 nung "Special Event of the Year - Government/ Organisation" aser "Festival of the Year" atema sempet ana tashi ngutetogo.

Dibrugarh nung African Swine Fever puteta tenokdangba agütsü

Dibrugarh, November 15, 2025 (Agencies): Assam kübok Dibrugarh district nung African Swine Fever (ASF) tasen putetogo aser iba ajanga district administration-i wara prokshia maotsü atema tenokdangbatem agütsüogo.

Moran Revenue Circle aser Tingkhong Revenue Circle nung ASF putetogo, ta District Animal Husbandry and Veterinary

Officer-i ashi.

ASF putetba farm aser meketa kilometre 1 telongtet "Infected Zones" aser kilometre 10 telongtet "Surveillance Zones" sangoktsür ta Additional Deputy Commissioner-cum-Chief Executive Officer, DDMA Dibrugarh, Dr. Monika Borah-i ashi.

Iba tetuyuba ajanga ak bener senzüba, akshi, ak chiyungtsü

asendaktepa aliba abenba noktanger.

Revenue, Police, Veterinary, Panchayat, aser Municipal bodies dena department ajak dang containment operations nung yariteptsü tetuyuba agütsüogo.

Police-ia lenmang nung ozüngi memelai akshi ayokertem dak tapet mapa inyaktsü tetuyuba agütsüogo.

Assam Police 2% dang teyira lir ta BMI assessment ajanga bushitet

Guwahati, November 15, 2025 (Agencies): Assam Police-i annual Body Mass Index (BMI) assessment agidang 'obese' telemsa nung police ajema akümba osang metetdaksüogo.

Taküm Assam Police nung 2% dang teyira (obese) ta bushitetogo. BMI drive ya

taküm agi tasembenbuba agir ta police department-i ashi.

BMI ya nisung ka tar aser temang touzük nung ajemdaker asadanger. World Health Organisation (WHO) ajanga 25 score angurtem 'overweight' aser 30 score angurtem 'obese' ta latetja lir.

Taküm Assam Police personnel 73,317 reprangdangba nung 2.06% dang teyira ta ngutetogo.

BMI ya mezün 2023 küm tenzük aser iba ya Assam Police nung fitness ajungkettsü aser operational readiness akangshitsü nükjidong nung tenzuka liasü.



November 13, 2025 nü Forest Department dena joint team kati Ukhrul district kübok Mullam hill range nung poppy alu ka nung jen rongdoktsüdang agiba noksa angur. Ali acre 35 shi ka nung security forces-i government agencies den yaritepa poppy alu raksatsü aser idangji parnoki jen asem rongdoktsü. November 12 nunga security personnel-i Kangpokpi district kübok ali acre 56 nung poppy alu yima aliba raksaja liasü.

Indonesia anentsüh lendong nung nisung 6 asü



Indonesia nung Central Java province kübok Cilacap nung aliba Cibeunying yimtsüung nung November 13, 2025 nü alinen aliba sülen ketdangsür temi Honibarnü iba lendong ajurur alirtem kumzüksü bushiba noksa nung angur.

Jakarta, Yimpoksüi/November 15 (Agencies): Indonesia kübok Central Java nung anentsü tesashi ka alubva sülen nisung trok asü aser nisung 17 samar bushidar, ta state news agency Antara-i Honibarnü sangdong ka ajanga metetdaksü.

Central Java nung mapang talangka tzünglu kanga sashia aruba sülen iba lendong ya ataloka liasü, ta kasa sangdong ajangsa metetdaksü.

Brehostibarnü Cilacap yimti nung anentsüh aluba sülen Cibeunying yimtsüung nung ki

aika rembanga liasü, ta disaster official Budi Irawan-i ashiba Antara-isa metetdakja liasü.

"Onoki ano tasü mang asem ngutetogo aser nisung 17 tang tashi monguteti lir. Onoki akokba tashi meranga inyakdar," ta Indonesia indang disaster management agency nung deputy ka tenü ng agi Budi-i ashi.

Agency yagi taoba mapanga tasü mang asem nguteter liasü.

Budi-i ashiba agi, anentsü agi anenbanger alirtem agizüksü atema kanga tasak kechiyong parnoki ali telung nung meter 3

nungi 8 tsü ngda nung anenbanger lir.

Iba Southeast Asian linük nung ya September ita nungi tzüngluruwa tenzüker aser April ita tembanger. Weather agency-i ashiba agi, iba mapang tzümetsü ng agi nüburtem kongshitsü ana nung lir aser tzünglu kanga sashia aruba ajanga anentsüh aluba amala lendong balala ajangshia arudar.

January ita-a Central Java kübok Pekalongan yimti nung tzünglu kanga sashia aruba sülen anentsük ka alua nisung 25 tashi taküm sama liasü.

Colombia-i USD 4.3bn entoka fighter jets 17 alitsü



Bogotá, Yimpoksüi/November 15 (Agencies): Colombia Tir Gustavo Petro-i, USD billion 4.3 entoka Sweden indang warplane tem alitsü atema tenangzüktepba yangluba sangdongogo. United States den tensa mejungi aliba mapang tang iba jenjang ya agiogo.

Petro-i ashiba agi, Sweden indang Saab aircraft manufacturer den Gripen fighter jets 17 alitsü atema tenangzüktepba ka yangluogo. Fighter jets alitsüba ya April ita sangdonger liasü saka tang mezü ngbuba sen kwi entoka tayimtsü kwi alitsü iba indang osang tejangja agütsüogo.

"Iba ya yimjung atema tsükchir nokdangtsü asoshi hadir ka lir," ta Petro-i ashi.

Colombia aser Latin America nung tanungba linüktem tang US military-i amokmerenba mapang ka nung warplane tem alitsü telemtetba agiogo. US nunger sepaitemi Caribbean aser Pacific anüdoklen rongtem maka arudar.

Washington-i ashiba agi, parnoki temesepba mozü shibelenba rongtem amaker, saka kuli tejangja magütsü. Parnoki tang tashi nung international tzüyim nung rong 20 makogo aser iba mapang nisung 80 shi tepsetogo.

Latin America nunger lenirtem, legal scholar aser right teloktemi, temesepba mozü shibelenba dak sendakba nung temzü ng ozü ng dak ajemdaker merenshitsü menela temesepba mozü shibelenner asütsü ta temulung melemi bilemertem tepsetba aitsüogo.

US Tir Donald Trump-isa, Petro aser Venezuela Tir Nicolas Maduro na temesepba mozü shibelenba nung densema lir ta shia aitsüogo, koba lenir anaprongla yagi magizüki liasü.

Petro-i ashiba agi, kolen nungi arudir aruaka Colombia amokmerenertem anema item warplane tasentem ya amshitsü.

Colombia lenir shiba Donald Trump den hopta ishika kati ka tilutsütepa arudar pai ashiba agi,

US nunger sepaitem iba tesemi yokba ya Venezuela indang totzü aser Latin America mesü ngjemteti kümdaktsütsü atema lir.

Trump-i yakta nungi temesepba mozü shibelenba atema Venezuela Tir Maduro aija arudar aser tawa Petro ya-a ozü ng alema tesempba mozü shishilembar ka ta shiogo, kechiyong Colombia nung cocaine aika yanglur. Trump-isa, Colombia nem US-i senotsü teyari agüja aliba aginogo, aser alima ajunga nung temesepba mozü shibelenba anema raraba mapang parnok den sendaktepa aliba linük indang list nungi aginogo.

Washington aser Bogota na o agi raratepba mapang Petro-i taoba hopta ashiba agi, Colombia-i temesepba mozü shibelenba dak sendakba nung US den itangitertem osang melemsateptsü. Ajisüaka pa kübok inyakba ketdangsürtemi iba amokmeren ya yakta dang agina liasü.

MAMATETER

Temeim Ojala, Mrs. Chubazü ngla Aier (Sü nggratsü), nai pongmang ka ama aoksaa onok toktsür asü yimi orr tanü November 16, 2025 anogo tashi nung küm ka renteta iba akümüli nung onok mulungjang kanga rongjenseta lir. Ajisüaka onok mulungjang nung na aliba agi onok anisü ngzüker aser onoki na teti menungraa bilemteter. Onok mulungjang nung na teti lir.

~ Temeim Kinungbo, Chirnurtem aser Kinungertem.

Japan-i China dang tapet mera agitsü ajungshir

Tokyo, Yimpoksüi/Nov. 15 (Agencies): Taiwan mechi tang mangatetep adoka aliba ajanga China-i par senso dang Japan mesemdangtsü ashiba sülen Honibarnü Japan-i Beijing dang tapet mera agitsü ajungshi

Japan-i China dang osang agütsüogo aser tapet mera agitsü tashi agi ajungshiogo, ta Chief Cabinet Secretary Minoru Kihara-i ashi. Pai iba mera indangbo rasaa mashi.

Hokulbarnü China-i par senso dang Japan mesemdangtsü tekumdangtsü ashi, koba Japan Ato Kilonser Sanae Takaichi-i o jembiba nungi mangatetep adokba lir. China-i Taiwan amakba ajanga "survival-threatening situation" asütsü aser Tokyo nungi mitkari telangzüba agütsütsü akok, ta lai taoba hopta shia liasü.

Iba ken o nung Japan aser China tangatetba balala aser osangtsüsang agiteptsü tongtipang ta Kihara-i ashi.

Democratic yimya nung yimsü asüba Taiwan ya China-i par indang ta ashir aser iba asetkong agitsü atema tashi mamshitsü ta shia mali, koba Japan nungi

kilometer 110 dang pilar lir. Beijing-i kibur kuma jembiba Taiwan sorkari magizüker.

Taoba mapang Japan lenirtemi yimjak nung Taiwan tenü ng tetshia mali aser terata nung yutsür, koba Tokyo indang security ally tongti, United States-ia junger ta agizüker.

Honibarnü China nunger airlines asema Japan-i aotsü atema tickets alia aliba meyipa agütsütsü mesüra angati kumtsütsü ta shia liasü.

Japan asoshi China-i travel restrictions agütsüba aser temeket tesemtem nung five-fire drills agiba ajanga region inyakyim nung temulung agütsür, ta Taiwan indang Presidential Office odongtar Karen Kuo-i ashi.

Beijing-i Japan anema amokmeren balala agütsüba ya Indo-Pacific nung security aser tashi ita aliba tsütsü lendong tulu agütsür, ta lai ashi.

China Maritime Safety Administration ajanga central Yellow Sea temeket nung Hombarnü nungi Mongulbarnü tashi live-fire exercise alitsü aser iba tzüyim telungi aitba nokdangtsü, ta shia lir.

Islamabad court kima bomb pokdaksüba nung telungpur 4 puogo

Islamabad, Yimpoksüi/Nov. 15 (Agencies): Pakistan yimtiba nung district court ka kima takum bendanga agütsür bomb pokdaksüba nung shilem agi ta tai tonglokja alir nisung pezü apuba Pakistan-i Hokulbarnü sangdongogo, kong nisung 12 takum samatsü aser 28 yiruja liasü.

Item nisungtem ya Tehrik-e-Taliban Pakistan (TTP) nung zü ngsemtem südi ta temulung melemi lir. TTP ya telok balaka lir saka Afghanistan Taliban den sendaktepa lir. Mongulbarnü Islamabad nung court kima takum bendanga agütsür amakba nung amshiba bomb ya Sajid Ullah-i amshia liasü südi ta amanger, ta sorkari social media X nung ashi.

Pakistan indang Intelligence Bureau aser Counter-Terrorism Department lungjemer operation ka agiba nung parnok ya apu ta sorkari ashi.

Hopta tetenzüklen Islamabad aser northwest Pakistan nung takum bendanga agütsür bomb pokdaksüba ya Afghan nunger mapa lir, ta Pakistan indang Interior Minister Mohsin Naqvi-i shir anogo ka lir parnok ya apu.

Islamabad amaktsü ya Telegram messaging app ajanga TTP commander Saeed-ur-Rehman-i totuyuba agütsü, ta Ullah-i itdangiter dang ashi. TTP commander dang ya Daadullah ta ajar, aser pai Ullah dang takum

bendanga agütsür bomb pokloktsür, Afghanistan senso, noksa ka yok, shiba Afghanistan nungi Pakistan arütsü alema aiter agizüksü totuyyba agüja liasü aser pa ya Nangarhar province nung alir ka liasü, ta sorkari ashi.

Lendong agütsür anenzüksü atema Ullah-i Islamabad anasa tesem ka anepalutsü aser mapang tatsüka lir tapoktsü oset aliba suidice vest ya Daadullah totuyuba nung northwest tsütsü Peshwar yimti nung leper ka nungi bener aru aser linük yimtibai bener ao, ta sorkari ashi.

Daadullah ya Pakistan indang Bajaur region nungi lir, aser pa ya TTP indang intelligence wong nung shilem ka aser tang Afghanistan nung atsüka lir ta ashi.

Mongulbarnü Islamabad nung bomb pokdaksüba aser Hombarnü northwest tsütsü Wana yimti nung cadet college telungi ia ghonda 20 jungnüa khatepba nung shilem agirtem ya Afghan sensotem lir, ta Naqvi-i Brehostibarnü shia liasü. Yangji sepai asem aser lendong agütsür ajunga tepset.

TTP-i nisung pezü apuba indang kecha sangdonga mali, aser Pakistan Ato Kilonser Shehbaz Sharif-i Afghanistan nung Taliban-i anir aliba sorkar den yimjung yanglushitsü asoshi maongka agütsür anogo ishika lir parnok ya apu.

NU Lumami campus annual sports meet tenzükogo



Dimapur, Yimpoksüi/November 15 (TYO): Nagaland University's Lumami Campus Sports Club (LCSC)-i ayongzüka 12buba Annual Sports Meet November 15 nü Multi-Purpose Hall nung tenzükogo.

Asayamung lapokba sentong tatsüka agiba sülen iba asayamung tenzükogo, kong university nung inyakertem aser campus nung alirtemi shilem agia liasü.

Asayamung lapokba sentong nung tongti tejaokerji Dr. Albert Khizo (Finance Officer, Nagaland University) liasü. Pai, club nükjidong, bendanga agütsüba züngsemtem aser parnoki campus nung alirtem nem teyari agütsüba asoshi kanga pelaba lemsatep.

Paisa, kasa campus nung alir süaka nisung aika kati ka den

memetettep alir, saka iba amala asayamung ayongzüka asayaba ajanga lokti tali longjemdaksür, ta ashi. Ano pai, asayadang amshiba oset balala aser tanga tenüngdakba teyari balala agütsüba atema Sports Section dang kanga pelaba lemsatep liasü.

Maneni Dr. Albert Khizo-i, asayamung nung shilem agirtem dang temulung ajak agi bendanga agüja jangratema shilem agütsü aser asaya ajanga telongjem tali adokdaksütsü ajungshia liasü.

Kasa mapang nung LCSC Tir Peter Ki-i (PRO, Nagaland University) lokti pela agizükba o jembiba mapang, 2012 küm September 18 nü club tenteter inyaksangshiyonga aruba indang lemsatep. Paisa, iba club ngutetertemi asaya ajanga campus nung alirtem

longjemdaksütsü asoshi nükla tajung yur iba club tentetba atema parnok nem tenügsang agüja liasü.

Asayamung tenzükur mezüngbuba anogo tebur aser tetsür voleyball, football aser penalty shoot-out asaya liasü. Iba asayamung ya November 22 nü tashi asayatsü.

Asayamung lapokba sentong nung ano Bethel-i ken tajung ka aten aser Dr. Rishikesh, Assistant Professor of Dept of Law, Nagaland University, aser Joint Secretary, LCSC-i Ghazal performance ka agüja liasü. Iba sentong ya Associate Professor of Dept of Sociology, Nagaland University & General Secretary of LCSC Dr. Sandeep Gupta-i tepela o jembiba den asayartem tenangzüktepba agiba sülen tembanga liasü.

Japan Masters: Lakshya Sen semifinal nung tsükogo



Yimpoksüi/November 15, 2025 (Agencies): India nung nüngtugu badminton asayar Lakshya Sen-i Honibarnü USD 475,000 Kumamoto Masters Japan semifinal nung kanga meranga asaya, saka game asem kanga toktepba asayaba sülen Japan nung asayar Kenta Nishimoto makok.

Seventh seed Sen, shiba tawa tajungba asaya arudar pai semifinal nung 19-21, 21-14, 12-21 agi Nishimoto mekoki liasü. Tena tsüngda minute 77 asaya liasü.

Iba asaya masaya tsüngda tena ponguben asayaba Sen-i asembenbo koker liasü, saka tena tesüsa taküm küm

tetenzüklen Indonesia Masters nung asayabo Nishimoto-i koker liasü.

Commonwealth Games champion yagi mezüngbuba game mekoki aliba nungi meyipa tur tanabuba game akok aser decider asaytsüsa aküm

Mezüngbuba game nung Lakshya 8-3 agi tejakdang liasü, saka iba sülen Nishimoto-i point tenet atonga ngua pa 10-9 agi tejakdang aküm.

Nishimoto-i smashi kanga junga amaba ajanga Lakshya timtemdaksü aser pa 15- 13 agi tejakdang aküm. Tena ka nem danga asaya amokbanga masayadaksüi kanga toktepa asaya saka tatem nung Japan nung asayar yagi 21-19 agi

asaya koka liasü.

Tanabuba game nung Sen 1-5 agi tesülen sür tenzük saka mapang tatsüka dang lir pa 8-7 agi tejakdang aküm. Break masü tsüngda India nung asayar yagi tatembangbuba point teku asayaba nungi ti koka liasü.

Break sülen asaya anaprongklai takok tashi tasa tajungtiba amshia asayatsü merang saka Sen-i tajungba asayateta pai tanabuba game ya 21-14 agi akok.

Decider asayaba mapang asaya tetenzük nungi Nishimoto-i tajung asaya tenzük aser pa yakda dang 5-2 agi tejakdang aküm. Break atongba mapang tashi nung Japan nung asayar ya point pezü agi tejakdang liasü.

Break sülen Nishimoto-i smash tajung ana malokja pa 14-7 agi tejakdang aküm aser mapang tatsüka dang lir pa 17-9 agi timba aküm.

Sen-i shuttle court adena züktokeba sülen Nishimoto nem match points ti agütsü aser pai ano smash tajung ka malokja asaya koka liasü.

KDVA-i G. Rio Memorial Volleyball Trophy indang metetdaksü

Kohima, Yimpoksüi/November 15 (TYO): Kohima District Volleyball Association (KDVA)-i sangdong ka ajanga G. Rio Memorial Volleyball Trophy (12buba Kohima Open Tournament; tebur aser tetsür) nung shilem agütsü aliba team tem dang November 16 nü 3:00 ako nungi tenzükua Khuochiezie (Kohima Local Ground) nungi player cards agizüktsü metetdaksüiogo.

Iba asayamung ya November 17 nungi 20 tashi Khuochiezie (Kohima Local Ground) nung asayatsü renema lir.

Taküm iba asayamung nung shilem agütsü aliba tebur team

temji Senapati Sporting Club, Southern Angami Sports Association, Marieri Mao, Ever Green Club, Ungma, Kiruphema Youth Organization (KYO) Junior, KYO B, Kazi Najrul Assam, Tantrum Volleys, M.H-10, KYO-A, Zing- Zing Kezo Town aser New Sendenyu Youth Organization nung lir.

Tetsür team tem rongnung Senapati SC, Masketeers VC, Teen Star, Elite Sister's Club, Dreamers, United Sisters, MADFA, Team Ace, Terhiipourie Mezoma, Tiema Khe Kidima, Serenity Spikers Kohima aser Titan Club nung densema lir.

Ryan Williams India team nung züngoksemogo



Yimpoksüi/November 15, 2025 (Agencies): India tebur senior football team coach

Khalid Jamil-i, AFC Asian Cup Saudi Arabia 2027 Qualifiers atema Dhaka, Bangladesh-i aotsü asoshi asayar 23 shimba sangdongogo. Iba asaya ya November 18 nü asayatsü, koba Group C nung tatembangbuba round asaya asütsü.

India team ya Bengaluru nung November 6 nü nungi training agia arudar aser parnok Dhaka-i Honibarnü nikongtsütsü aotsü.

Forward Ryan Williams, shibai tawa Indian passport agizükogo pa team den Bangladesh-i aotsü, saka pa asaya nung asayatsü masayatsü ajibo Football Australia nungi No Objection Certificate ka agizükba aser iba sülen FIFA aser AFC nati temelaba agütsüba dak keta lir.

Taoba ita Singapore 1-2 agi makokba sülen AFC Asian Cup Saudi Arabia 2027 atema qualify asütsü asoshi India timla kecha mali. Iba asaya makokba sülen parnoki asaya pezü nung

point ana dang nguteter lir. Parnoki tanungba asayatem kokaka point ti ya qualify asütsü asoshi teperi masütsü.

AFC Asian Cup Saudi Arabia 2027 Qualifiers Final Round atema Bangladesh-i aotsü aliba India squad:

Goalkeepers: Gurpreet Singh Sandhu, Hrithik Tiwari, Sahil.

Defenders: Akash Mishra, Anwar Ali, Bikash Yumnam, Hmingthanmawia Ralte, Jay Gupta, Pramveer, Rahul Bheke, Sandesh Jhingan.

Midfielders: Brison Fernandes, Lalremtuanga Fanai, Macarton Louis Nickson, Mahesh Singh Naorem, Nikhil Prabhu, Suresh Singh Wangjam.

Forwards: Edmund Lalrindika, Lallianzuala Chhangte, Mohammed Sanan, Rahim Ali, Ryan Williams, Vikram Partap Singh.

Bangladesh aser India na asaya ya November 18 nü National Stadium in Dhaka nung 19:30 IST nungi tenzükua asayatsü aser FanCode nung live sayutsü.

BILEMDANGANG

"Amungnü meshiteta yuang."